

七十二家集

江令君集卷之三

陳濟南江摠摠持著

明閩漳張燮紹和纂

詔

舉士詔

堯施諫鼓禹拜昌言求之異等久著前冊舉以
滯淹復聞昔典斯乃治道之深規帝王之切務
朕以寡昧丕承洪緒未明虛已日旰興懷萬機
多紊四聰弗達思聞謇諤採其默語王公以下

各薦所知
傍詢管庫爰及興皂一介有能
片言可用
朕親加聽覽
佇茲啓沃

表

讓尚書令表

臣弱歲立朝本無竒志每謂任登常伯足承基
緒值梁季不造收拙人間東竄三江南徂百越
不知秦漢十有七年心迹退黜平生畢矣但野
性疎懶不屑死增俯仰乖時人物多忤天飛踐
祚任寄隆重謬以商丘之木遂比舟楫之材燕
岱之石混同瑚璉之器當由崇賢使舉早守名
節竊以天府文昌萬方之藪天官冢宰無所不

統禮尊三獨事昭百揆曠職云久三十餘載一
旦開置必資望實豈期廷典私偏濫庸菲薄陞
下聽覽餘辰曲垂昭納遂斯及汗高選具瞻則
敝蓋敝帷使臣暮齒歲制月制賒臣皎髮不以
一怠

陳後主授江總尚書令冊文附

夫文昌政本司會化經韋彪謂之樞機李固
方之斗極况其五曹斯綜百揆是諧同冢宰
之司專臺閣之任惟爾道業標峻宇量弘深

勝範清規風流以爲準的儒宗學府衣冠以
爲領袖故能師長六官具瞻允塞明府八座
儀刑載遠其端朝握揆朕所望焉往欽哉懋
建爾徽猷亮采我邦國可不慎歟

讓尚書僕射表

藻鏡官方品裁人物門驚如市不慚屋漏心抱
如水無欺暗室但屢淹星鳥每知忝素世網拘
束事歸僦勉今此召會尤增據蒞竊以端揆副
職官稱師長革履升降傳呼寵赫儀刑朝首冠
冕彛倫兼復參總衡流匡佐聖治妄膺重責必
踐危機

讓吏部尚書表

竊以漢置五曹方今六尚魏隆八凱擬古六卿
近喻喉舌遠膺樞斗至如東京西晉裴王仰首
伸眉可得論列此矣但臣門基世縮晉宋以來
內侍帷展入尸衡尺或年甫將立或歲未強仕
是以退思弱冠追傷疇昔早塵華任見知名輩
常謂忝竊匪朝伊夕豈期梁室多故有志無時
平生意氣颯爾零落特由邀奉嘉運千載一時
惟奮寵靈遂臻於此

爲沈君理讓僕射領吏部表

辛酉以來安石以後遵其軌躅必大廈之棟梁
總其委任亦巨川之舟楫未有綿力薄材輕膺
此舉

爲衡陽王讓吳郡表

芝泥馳印發命開函 穎之誠夏霜易實兢惶
之至春冰可涉臨淄回軌卽事何取廣川無聲
頗知自匹

爲蕭大保謝儀同表

阪泉野戰曾無汗馬之勞代邸運籌又闕前戈
之勇薄伐專征早遊邊外執玉奉酎又虧朝則
王人降止朝冊遠臨奉述勅書曲停表奏滄波
阻復旣杜敬仲之辭關路悠長致絕趙襄之讓
心馳紫路登文石而莫由目送白雲拜承明而
無日

謝敕給鼓吹表

畧尋近古逖聽前事王文憲佐華命沈隱侯
經綸始運騎吹之榮猶難忝冒以臣况此寔非
倫輩豈可更崇文物重假名噐高臺迢遞未朱
夏而登臨芳樹華滋非青春而奏曲

爲陳六宮謝表

鶴籥晨啓雀釵曉眎恭承盛典肅荷徽章步動
雲桂香飄霧縠媿纏艷粉無情拂鏡愁縈巧黛
息意臨牕妾聞漢水贈珠人間絕世洛川拾翠
仙處無雙或有風流行雨窈窕初日聲高一笑
價起兩環乃可桂殿迎春蘭房侍寵借班姬之
扇未掩驚羞假蔡琰之文寧披悚戴

章

爲陳六宮謝章

恭膺禮命愧集丹縷之顏拜奉曲私愁縈翬羽
之色魯宮夜火伯媛匪驚楚榭奔濤貞姜何懼
豈期日月騰影風雲寫潤乃復位崇九御聲高
六列象服增華丹輶耀采何以弼佐王風克柔
陰化兢惶竝集追想流荇之詩荷據相并遂失
鳴環之節

啓

上毛龜啓

臣聞聖王受命以代紹興日月精明之狀煙雲
爛熳之采神鼎出於汾陰寶玉開於張掖靈山
輿澤卉木呈祉靜海澄波鱗介禔福靡不顯符
瑞以固鴻基肇徵祥以光永世者也影合四靈
光分五色懷星拖月負字銜圖

除尚書令斷表後啓

司會治本冢宰朝端搢紳所屬儀刑攸在皇代
以來無人則闕陛下將備厥職用穆巨僚不窳
始自庸菲以謹物議當今藩翰至戚不無其才
卿廟重臣亦有其器伏願檢俞往之則闡平章
之道臣泐心布款有理存焉

除尚書令謝臺啓

竊以昔之冢司今日端揆頃同台衮無人則闕
臣之朽薄安可叨賁謹當奏承夜月冀奉三思
之旨聲寄浮雲方祈九天之路

謝宮爲製讓表啓

如攀珠樹徒仰照匣之輝若踐玉田不知照廡
之價芙蓉之水亟奉北園迷迭之文屬陪南館
久降噓枯之旨許賜凌雲之筆清夜讌斯謂言
善戲黃金然諾竝遂殊寵年齊柏寢豈報恩榮
紙聲蘭臺未書悚戴

除太子詹事謝東宮啓

庇身修德濫迹端形陳蘿故葛攀附不涯解角
翫鱗超踰非次方辭璽會覬收渥澤

江令君集卷之四

陳濟南江揔揔持著

明閩漳張燮紹和纂

序

自序

歷升清顯備位朝列不邀世利不涉權幸嘗撫
躬仰天太息曰莊青翟位至丞相無迹可紀趙
元叔爲上計吏光乎列傳官陳以來未嘗逢迎
一物干預一事悠悠風塵流俗之士頗致怨憎

榮枯寵辱不以介意太建之世權移群小諂嫉
作威屢被摧黜柰何命也後主昔在東朝留意
文藝夙荷昭晉恩紀契濶嗣位之日時寄謬隆
儀形天府釐正庶績八法六典無所不統昔晉
武帝策荀公曾曰周之冢宰今之尚書令也况
復才未半古尸素若茲晉太尉陸玩云以我爲
三公知天下無人矣軒冕倘來之一物豈是預
要乎弱歲歸心釋教年二十餘入鍾山就靈曜
寺則法師受菩薩戒募齒官陳與攝山布上人

遊款深悟苦空更復練戒運善於心行慈於物
頗知自勵而不能疏菲尚染塵勞以此負愧平
生耳

陶貞白先生集序

昔劉向通古今之學馬融見天下之書京房察
風雨之占裴楷曉陰陽之術子政傷於簡易季
長敝於驕侈君明逐不旋踵公矩纔免極誅鮮
有盡美之迹罕聞克終之譽若夫德行博敏孔
室四科經術深長鄭門六藝卅陽陶先生備斯
矣至如紫臺青簡綠帙卅經玉版秘文瑤琨怪
牒靡不貫彼精微殫其旨趣蓋非常之絕伎命
世之異人焉文集缺亡未有編錄門人補輯若

逢遼東之本好事研搜如誦河西之篋奉勅校
之鈐墨緘以緹紉藏彼鴻都副在延閣

碑

皇太子太學講碑

我大陳之御天下若水渙其長瀾瑤星躔其永
厯重華誕睿興於大鹿之野敬仲繼業盛矣鳴
鳳之占兼以鴻才海富逸思泉瀉含毫落紙動
八閩之歌謹隻句片言諧五聲之節奏雲飛風
起追歷漢帝之辭高觀華池遠跨魏王之什爰
復建藏書之冊開獻書之路帷帳叢殘家壁遺
逸紫臺秘典綠帙奇文羽陵蠹迹嵩山落簡外

史所掌廣內所司靡不飾以鉛槧雕以綑素此
文教之修也

吳興郡廬陵王德政碑

卓爾吾王天人可擬早成夙智謙懷虛已偃息
流畧翺翔文史三雍雅對九師名理好古如斯
學兼之矣睢陽肇構碣石初開賜田待士勸道
求材剖符彭國述職琅臺去謠曙鼓留歌暮來

攝山棲霞寺碑

蓋聞天有神宮地云靈府桑欽博記始敘四衢之塔金朔著經因知千步之寺至如峰形甌累岫勢堂密亦烏足言哉南徐州瑯邪郡江乘縣界有攝山者其狀似繖亦名繖山尹先生記曰山多草藥可以攝養故以攝爲名焉南瞻舊落顧悌鎮戍之塢北望荒村扈謙卜筮之宅此山西南隅有外道館地俄而疫癘磨滅三清遺法未明五怖之災萬善開宗遂變四禪之境倏見

齊居士平原明僧紹空解淵深至理高妙遺榮
軒冕遁跡巖穴宋泰始中嘗遊此山仍有終焉
之志村民野老競來諫曰山多狼虎毒虺所以
久絕行踐僧紹曰毒中之毒無過三毒忠信可
蹈水火猛獸亦何能爲乃刊木駕峰薙草開逕
披拂蓁梗結構茅茨廿許年不事人世渡河息
暴擾篋無立皆曰誠至所感有法度禪師家本
黃龍來遊白社梵行殫苦法性純備與僧紹冥
契甚善嘗於山舍講無量壽經中夜忽見金光

照室光中如有臺館形像豈止一念之間人王
照其香蓋八未曾有淵石朗其夜室居士遂捨
本宅欲成此寺即齊永明七年正月三日度上
人之所構也山情率易野製疎朴崖檐峻絕澗
戶幽深卉木滋榮四時助其雕綺煙霞舒卷五
色成其藻絢居士嘗夢此巖有如來光彩又因
閒居依稀目見昔寶海梵志睡觀花臺智猛比
丘行逢影窟故知神應非遠靈相斯在居士有
懷創造俄而物故其第二子仲璋爲臨沂令克

荷先業莊嚴龕像首於西峰石壁與度禪師鐫
造無量壽佛坐身三丈一尺五寸通座四丈并
二菩薩倚高三丈三寸若乃圖寫瓌竒刻削宏
壯蓮花瑩目石鏡沉暉藕絲縈髮雲幄失彩項
日流影東方韜其大明面月馳光西照匿其成
魄大同二年龕頂放光光色身相晃若炎山林
間樹下赭如火殿禪師自識終期欣瞻瑞應以
建武四年於此寺順寂豈非六和精進十念允
諧向沐寶池方登金地者也齊文惠太子豫章

文獻王竟陵文宣始安王等慧心開發信力明
悟各捨泉貝共成福業宋太宰江夏王霍姬蕃
閨內德齊雍州刺史田奐方牧貴臣深曉正見
妙識來果竝於此巘阿廣抽財施琢磨巨石影
擬法身梁太尉臨川靖慧王道契真如心弘檀
密見此山製置疎濶功用稀少以天監十年八
月爰撤帑藏復加瑩飾續以丹青鏤之銑塋五
分照發千輪啓煥排天堂廡玉露分色接岫軒
墀翠微抽影八定之侶步織草而揚梵三慧之

僧挹飛泉而動色喜園凝靜豈傲吏之凡遊深
谷虛玄非愚公之俗路是以王公縉紳之輩卽
吏胥史之屬步林壑陟臯壤升精舍拜道場莫
不洗滌無明澣濯囂暗非直心之砥路孰能如
斯者乎慧振法師志業該練心力精確度上人
將就遷神深相付囑法師聿修厥緒勸助衆功
基業田園多所創置先有名德僧朗法師者去
鄉遼水問道京華清規挺出碩學精詣早成波
若之性夙植尸羅之本闢方等之指歸弘中道

之宗致北山之北南山之南不遊皇都將涉三
紀梁武皇帝能行四等善悟三空以法師累降
徵書確乎不拔天監十一年帝乃遣中寺釋僧
懷靈根寺釋慧今等十僧詣山諮受三論大義
賈誼曰學聖道如日之明孫卿云登高山知天
之峻今之探賾其此之謂南蘭陵蕭朏幽棲抗
志獨法絕群遁世茲山多歷年所臨終遺言葬
法師墓側還符田豫託西門之冢更似梁鴻偶
要離之瘞又按神錄云楚蘄神在今臨沂縣齊

永明初神詣法度道人受戒自通曰靳尚卽楚
大夫之靈也大同元年二月五日神又見形着
菩薩巾披袈裟閑雅甚都來入禪堂請寺衆說
法崑嶺之中百神所在首陽之路八駟竝驅未
有修淨戒之品詣得道之僧整忍辱之衣入安
禪之室是知名山大澤靈異憑依者矣慧布法
師幼落煩惱早出塵勞律儀明白貞節峻遠貫
綜三乘不自媒衒楷模七衆無所詆訶曩日靜
憩鍾巖余便觀止飡仁飲德十有餘年頃於攝

阜受持珠戒佩服之敬雖敢怠於斯須汲引之
勞且曷伸於報効夫言意難盡鉛槧易凋固比
河山莫如金石凡諸徵應并預隨喜竝勒於碑
左乃爲頌曰

漫漫心火冥冥世流論生若寄喻死如休三明
未了十智難周盡纏癡愛豈離瘡疣敬仰鷄足
恭聞鶯頭斯風可羨其路何由我開梵宇面壑
臨丘我圖靈跡果植因修兼金畫繪泐石彫鏤
連雲出沒泄雨沉浮經行松磴禪坐蕙樓澗風

長瀉崖溜懸抽花臺似雪夏室疑秋名僧宴息
勝侶薰修三乘謂筏六度爲舟金幢合蓋寶駕
驅輶地祇來格天衆追遊五時無爽七處相侔
辭題翠琰字勒銀鈎賢乎樂餌過客宜留

大莊嚴寺碑

蓋聞僧伽水濱波斯創以禪地醍醐山頂舍那
肇其梵域此乃往劫之勝因上方之妙範於是
俯察地勢懸之以水仰惟皇極揆之以日百堵
咸作千坊洞啓前望則紅塵四合見三市之盈
虛後睇則紫閣九重連雙關之聳峭加以園習
歡喜水成功德池溢甘露不因玉掌樹搖音樂
無待金奏薰鑪夜爇遙來海峴之香法鼓晨謹
非動泗濱之石擢莖金表跨八萬之俱成界道

銀繩面四衢而拓製厠壁綴珠凌丹霞而結宇
雕光縷采望紫極而開軒俯看驚電影徹琉璃
之道遙拖宛虹光徧水精之域層楹刻桷風伯
走而未升靈輦飛薨雨師攀而不逮銘曰

灼爍金莖崔嵬銀表翔鷲仰翥威鳳靈矯木密
聯綿香泥繚繞日圖檐外荷披棟杪翠落陰虬
珠填陽鳥高僧累萃願學茲多弘宣方等博綜
圍陀皆傷寸晷竝悟尺波式旌鏤碣無待雕戈
標年剎土比數恒河

建初寺瓊法師碑

夫智慧精進皆曰第一妙德淨名竝稱不二若
乃幹五欲之泥解六情之網禦寶車之跡面香
城之路荷持像法汲引人倫惟此法師心力備
矣東山北山之部貫花散花之句竝編柳成簡
題蒲就業學非全朔無待冬書師夢尹儒自知
秋駕銘曰

屑屑人世茫茫大千欲流心火意樹身田老驚
靈籙孔惜逝川三空莫辯二諦何詮佛日初照

慈雲不偏秋露寂滅莫繫悠然

明慶寺尚禪師碑銘

百世之上百世之下含章隱璞明眞照假空行
已無希音和寡不有耆德誰其繼者朗月靈懸
萬風獨寫

江令君集卷之五

陳濟南江攄攄持著

明閩漳張燮紹和纂

頌

莊周頌

玉潔蒙縣蘭薰漆園丹青可久雅道斯存夢中
化蝶水外翔鯤出俗靈府師心妙門垂竿自若
重聘忘言悠哉天地共是籠樊

贊

香贊

海岨相傳香流大千不吹自轉將銷更燃縈空
雜霧散迴飛煙還符戒品薰修福田

花贊

池中寶花葉覆金沙逆風氣亂映水光斜散由
天女賣乃王家若生心樹願結因牙

燈贊

寶燈夜開光遍花臺烟抽細燄燼落輕灰珠慙

色竝月耻光來一明暗室若遣塵埃

幡贊

金幡化成搖蕩相明留無定影散乃俱輕光分
糾殿采布香城恒知自轉福與之生

銘

永陽王齋後山亭銘

叢臺造日溜館連雲錦墻列續繡地成文吾王
卓爾逸趣不群梅梁蕙閣桂棟蘭枌竹深蓋雨
石暗迎暉激流疑疏構峰似削苔滑危磴藤攀
聳嶸樹影搖牕池光動幕月澄遙淑風清近壑
雪岍難消花園易落高桐百尺垂楊五株開榮
九畹結秀三珠山條紫的水葉紅鬚抽芳繞靄
接翠分衢亭謹旅鶴浦淥驚鳬前列枚馬後招

申白諷誦楚詩精微沛易叢桂留賞散金匪惜
不羨睢陽還強碣石馳聲終古服義無斁

芳林園天淵池銘

有序

歲次執徐月維大呂爰命梓匠廣修畚鍤標置
舊趾開浚昔基東西彌望雲霧之所澄蕩南北
紆縈虹霓之所引曜曉川漾壁似日御之在河
宿夜浪浮金疑月輪之馳水府前漱萬雉列榭
參差却拒三襲危巒聳峭壞鳥異禽自學歌舞
神木靈卉不知搖落昔叔皮覽海序螭蛟之汎
濫古甫臨舟美攄松之蓊茸尚復著在吟咏緘
彼緹緇况我君門盛事未紀謬頒待詔謹製銘

云

石溝溜密蘭渚潮平九華閣道百丈層盈液搖
殿色殿寫波明

玄圃石室銘

僊巖石榻僊宇石墻地云正域道示修羊紫煙
碧露絳雪玄霜廣成不踐王烈未翔移華甲觀
徒構震方達跨飛梁俛臨倒景瓊蘂珠樹金階
玉井映日分暉搖風共影岫濃翠合棼虛桂靜
朔去偷桃董來貨杏檐非刻削戶恣登臨迎春
花近避暑涼深秋雲卷閣冬霰停陰桐棲鳳采
竹化龍吟輕飛亂色激溜成音天縱儲睿生知
作兩絃誦餘隙仁智爲賞河曲停遊洛濱息往

祥梨吐秀瑞燕流響一物或鑄萬國斯仰

懷安寺刹下銘

四聰磨后萬行了因運光玉鏡道茂金輪爰構
靈刹地迹重闔迎風雲表承露天津飛甍巖巖
累棟嶙峋護持七衆警衛百靈籌策草木劫盡
沙塵支提永固福業恒新變易東海長久北辰

方鏡銘 有引

此鏡以照著衣鏡背圖刻八卦二十八宿仁壽
殿前無以加斯彫麗也

玄羯命巧仲呂呈祥金鑄石漢銅鑄丹陽價珍
負局影麗高堂圖星擬蓋寫卦隨方明齊水止
照與天長增輝兎苑永侍龍光

鐘銘

鳧氏之匠
扭陽之銅
圖鑠鑄
鐫刻獸鑄
蟲聲飛
雪裏韻切
唇中遙符
玉律遠雜
金風朝驚
鷺嘖
夜動龍宮
冀憑慧業
冥感神功
百非洗蕩
萬善招通
長如五淨
永証三空

又

篆間鎔刻
樂上雕鐫
聲齊法鼓
響逸鳴樅
捷舟移
巨壑火壤
初禪

優填像銘

如花譬象若火疑龍毫光此遇法相今逢眸雲
齒雪月貌金容大仙下降避席爲恭

哀策文

陳宣帝哀策文

望蜃綽而攀標拜龍敢而慟絕變五統而淒涼
迴三辰而慘切感川岳而地維傾號穹蒼而天
柱折千祿茂德萬世鴻名爰詔掌禮式序英聲
其辭曰

嫺水樞宿姪墟大虹謳歌承曆揖讓受終重規
帝緒踵武王風名山紀迹清廟傳功我后丕承
思弘祖業莅政恭已臨朝凝默煥爛九功歲徃

七德憲章昭著威靈允塞爰茲發迹天步艱難
連華勝衛比譽應韓羽儀戚右軒冕朝端祈膺
當璧繇顯大橫延喜授玉告善飛旌神器有奉
性道無名詩頌唐年樂舞姬日仁聲汪濊武義
洋溢理訟總街凝情衢室巡望如禮幽祇咸秩
疆垂叛援關微虔劉治兵丹浦獲醜青丘屠釣
且拔管庫方搜如龍駕鼓獻雉焚裘天必呈祥
地寧愛寶神禽奇獸嘉穀靈草屈軼抽階飛黃
伏皐綺雲舒慶珠星照老廣敷丘索弘啓膠庠

書林吐馥文囿含鏘南洽侯衛北暢遐荒殷羅
自解周圍無傷金英掩色玉床弗豫天駟摧鑣
王良失御鑄鼎奚益綴衣何處漫漫幽夜冥冥
上仙長違拜日失意祈年寧神卜兆晏駕廻天
銅麟感泣銀海埋田出德陽之廣殿動繁笳之
哀囀渡洛水之浮橋望偃師之近縣背紫陌而
未遠隱黃山而不見鐸啓挽而依依馬嘶風而
戀戀平原欲晦落照將垂鳳蓋飄而水暗鸞蹕
聳而山危曳地旗之舒卷間翠野之參差鳥哀

哀而驚曙松瑟瑟而吟枝異故鄉之絲竹非舊
宅之埴簷掃秋葉而無盡薦春櫻而願知北邙
已謝西陵何有遠宿蒼梧便垂仁壽聲合韶濩
道宣戶牖共瀛海而恒流竝嵩華而莫朽

誄

梁故度支尚書陸君誄

君諱襄字師卿吳人也祖惠徹宋車騎府法曹
行參軍父閑揚州別駕齊永元紹曆蕭遙光謀
反伏誅閑以州職見害子絳其日并命忠孝之
道萃此一門襄時年十四號毀殆滅布衣蔬食
終於身世起家著作佐郎出爲永寧縣令累遷
臨川王廬陵王法曹外兵記室入爲太子洗馬
掌管記中書舍人管記如故爲丹陽尹丞俄遷

太子庶子掌管記揚州治中太子家令領國子
博士管記如故丁母顧夫人憂廬乎墓所服闋
又從家令轉中庶子並掌管記遷中散大夫金
華宮家令出爲鄱陽內史除尚書吏部郎秘書
監領揚州大中正度支尚書太清二年三月京
師傾覆君竄跡還鄉吳民陸黥起義民攻郡擾
攘之際憂憤而終春秋七十有二余避世河滸
暫之吳國百舍不容千里無饋陸公國士之眷
惠好之深朝同飢粥夕共瓢飲契濶晤言流連

晦朔日月逝矣懷古何忘臨哀能誅久願搖筆
時事屯邅不遑削藁梁季適越未戢干戈陳世
入仕累牽物役杼軸於懷四十餘載隋開皇九
年於長安致仕懸車已洎就木幾何但東海成
田南冠永繫龜山更促空想吹笛之哀馬角徒
生絕望通波之水嗚呼哀哉攬涕操觚乃爲誄

曰

嫺苗碩茂完裔繁昌賓門穆穆筮仕鏘鏘食采
命氏遐哉陸鄉四昇臺省八辟賢良分柯振葉

令聞令望玄粧朱鞞翠弁金鎗流聲世祀列讚
祠堂別駕貞烈志存名教捐生殉主知死不撓
暉映泉壤痛此忠孝於鑠夫子積德累仁韜光
戢耀隱璞含真居哀能痛至情通神淚枯瓏樹
哀感馴禽永慟家禍長號不辰玄黃絕睇蔬布
終身心符屈婞室等原貧分甘共感內族外姻
求之今古斯爲異人月下奏章螢前讀史給紙
蘭臺觀書洛市強學待問潤身爲已結髮濯纓
登朝入仕昂昂逸驥逐日千里宛宛長離陵江

迅起枳棘棲鳳化行乳雉平臺累陟石扇甃屐
跼伏不競焚絲自理綺席無譏師訓胄子驥足
時務俊民斯俟秋實選能春華備美思媚儲后
遊息承華書記策擢爵命增加彈碁擊筑沉李
浮瓜追隨飛蓋侍從鳴笳二儀迴幹四氣淹賒
離景遽沉前星奄滅撫已惟舊懷恩守節昔荷
故臣攀號聲折登高能賦大夫就列金華式肇
更奉清切修竹貞松含霜抱雪下車軒日求瘼
康時良辰坐嘯朗夜卧治懸魚化靜佩犢去思

廣弘條教精察毫釐典選搜揚操刀密勿不紊
朱紫傷無請謁秘署學林得人超忽延閣紉素
校文遺闕工妙鉛槧譽成朞月鴈行攸序龍作
簡才讓珠不拜賜劍恩來帝曰俞往爾行兼該
金城失險玉弩流災年臻几杖病息草萊世故
天禍臣悲主辱露盡朝陽風驚夜燭黃鵠超遙
白駒何促事迫歸魂依然啓足悠悠世路辛苦
艱虞尋戈滿道暴骨交衢家無半菽地絕飛芻
念君桑梓零落凋枯傷君井邑子戾崎嶇喪亂

絕卜葵藿荒蕪淒涼故友擗標遺孤臨穴外野
撫棺窮途嗚呼哀哉爲善豈懼修名難假德履
中和道周文雅不朽之迹非謂泉下疊疊清風
冷冷獨寫嗚呼哀哉

墓誌銘

廣州刺史歐陽頎墓誌

公家習尚書少府儒高於漢明世居渤海太守
文重乎晉原中原喪亂避地南徙公孝敬純深
友悌敦睦家積遺財並讓諸季兼調同壤公含
章內映遠識沉通室嗜欲謹言行資貞幹事廉
闊梁室不造凶羯憑陵公被銳執兇有志匡復
梁孝元帝授散騎常侍東衡州刺史始興縣侯
而大戎弑逆宗社播遷陳纂揖讓攸歸高祖恩

加惟舊授使持節都督南衙二十二州諸軍事
廣州刺史進爲開府儀同三司山陽郡公進號
征南將軍加鼓吹一部巫山遼曲喧騎吹千日
南芳樹清音肅軍容於海截追贈車騎將軍司
空公涉獵六經優游百氏寬徭省賦化百越之
歸心撫寒投醪感三軍之死力在室如賓寧慚
屋漏不貪爲寶每畏人知殺青無兼兩之疑薏
苡豈懷珠之謫如羊如粟不改夷齊之心遺慶
流風方留豹產之德

特進光祿大夫徐孝穆墓銘

耕耘書圃戈獵文場藻思綺合尺牘繡揚辭奪
太史筆利于將心緘武庫口定雌黃奉使巡採
絕域遐深市朝遷貿陵谷相侵形寄王績名宣
攀附高排閭闔鬱轉雲路年踰致仕齒及懸車
夜漏方盡馳光復斜平原出宿庠序爲家隴愁
宿霧松悲閑鳥地迥雲低山重樹小九原孤月
三泉送旒疇曩行役共上河梁余因病免君事
遠將痛心期之徂謝憫時代之銷亡冀鐫石於

玄冢留清風於故鄉

司農陳暄墓銘

其文骯髒其筆縱橫背碑卽誦據馬俄成誹諧
見賞調笑忘情兩宮寵官四主恩榮萬事依息
一朝追送疇昔命觴文可吟諷今日酌酒長悲
且慟

中領軍魯廣達墓銘

災流淮海險失金湯時屯運極代革天亡爪牙
背義介胄無良獨標忠勇率禦有方誠貫皎日
氣勵嚴霜懷恩感報撫事何忘

侍中沈欽墓誌

早結南陽之親致興沛市之役四埏多難三江
屢梗君敦淳化以勵澆風庶滌清流以蕩濁俗
早邁紫雲萍濡碧海奮里閭之寵躍車馬之貴
咽寶氏之青山耻郭家之金穴

文

群臣請陳武帝讖文

某值某甲稽首和南十方三世一切諸佛十方
三世一切尊法十方三世一切賢聖見前大德
僧皇帝某菩薩睿哲聰明廣淵齊聖心若虛空
照窮般若發弘大誓荷負衆生神道會昌膺茲
景業百王既季運屬艱難五嶽維塵六軍日動
劬勞在念有切皇心既而深悟苦空極信無我
寶臺華柱本非實錄賊城樓櫓苦具茲多遂坐

道場靜居禪室堅固善本具足檀那石壁山河
珍車象馬頭目髓腦妻子國城鑾輅龍章翠帳
玉几福德所感威惠所及莫不肅然大捨供養
三尊便欲拂衣崕峒高步六合到林間而宴坐
與釋種而同遊紫微虛宮黃屋曠位上靈聳動
厚土怔惶弟子等身纏愛惑業構煩惱天生烝
民樹以司牧懔懔黔首非后罔戴豈容尊居萬
乘而伸獨往之情應在帝王而爲布衣之事且
蠻夷猶夏寇賊姦宄燧人警職日照甘泉之火

西郊多壘未肆樓船之威若使七聖遂迷宵然
汾水之上八駿沃若方在瑤池之濱則天下何
依群臣莫奉宗社廟堂有廢彝則弟子不勝狼
狽之切謹拾如千錢如十物仰覲三寶大衆奉
贖皇帝及諸王所捨悉還本位伏願十方三寶
見前大德僧以慈悲力用無礙心坐道放光顯
揚宣說勸喜和合超然降許當使皇帝望雲望
日之姿與南山等固乃神乃聖之德與北極同
尊中宮后妃之星金禎玉幹之戚窮積善之慶

盡萬歲之懽玉鑾迴鑣金門洞啓百辟翹首措
紳並列願塵勞與雲沴俱銷億兆與天地同泰
懽懽卅愚敢以死請弟子某和南

附錄

江揔傳

唐姚思廉

江揔字揔持濟南考城人也晉散騎常侍統之
十世孫五世祖湛宋左光祿大夫開府儀同三
司忠簡公祖蒨梁光祿大夫有名當代父紇本
州迎主簿少居父憂以毀卒在梁書孝行傳揔
七歲而孤依於外氏幼聰敏有至性舅吳平光
侯蕭勵名重當時特所鍾愛嘗謂揔曰爾操行
殊異神采英拔後之知名當出吾右及長篤學

有辭采家傳賜書數千卷摠晝夜尋讀未嘗輟
手年十八解褐宣惠武陵王府法曹參軍中權
將軍丹陽尹何敬容開府置佐史竝以貴胄充
之仍除敬容府主簿遷尚書殿中郎梁武帝撰
正言始畢製述懷詩摠預同此作帝覽摠詩深
見嗟賞仍轉侍郎尚書僕射范陽張纘度支尚
書琅邪王筠都官尚書南陽劉之遴竝高才碩
學摠時年少有名纘等雅相推重爲忘年友會
遷太子洗馬又出爲臨安令遷爲中軍宣城王

府限內錄事參軍轉太子中舍人及魏國通好
勅以摠及徐陵攝官報聘摠以疾不行侯景寇
京都詔以摠權兼太常卿守小廟臺城陷摠避
難崎嶇累年至會稽郡憩於龍華寺乃製修心
賦畧序時事摠第九舅蕭勃先據廣州摠又自
會稽往依焉梁元帝平侯景徵摠爲明威將軍
始興內史以郡秩米八百斛給摠行裝會江陵
陷遂不行摠自此流寓嶺南積歲天嘉四年以
中書侍郎徵還朝直侍中省累遷司徒右長史

掌東宮管記給事黃門侍郎領南徐州大中正
授太子中庶子通直散騎常侍東宮中正如故
遷左民尚書轉太子詹事中正如故以與太子
爲長夜之飲養良娣陳氏爲女太子微行摠舍
上怒免之尋爲侍中領左驍騎將軍復爲左民
尚書領左軍將軍未拜又以公事免尋起爲散
騎常侍明烈將軍司徒左長史遷太常卿後主
卽位除祠部尚書又領左驍騎將軍參掌選事
轉散騎常侍吏部尚書尋遷尚書僕射參掌如

故至德四年加宣惠將軍量置佐史尋授尚書
令給鼓吹一部加扶餘竝如故禎明二年進號
中權將軍京城陷入隋爲上開府開皇十四年
卒於江都時年七十六摠篤行義寬和溫裕好
學能屬文於五言七言尤善然傷於浮艷故爲
後主所愛幸多有側篇好事者相傳諷玩于今
不絕後主之世摠當權宰不持事務但日與後
主遊宴後庭共陳暄孔範王瑗等十餘人當時
謂之狎客由是國政日頽綱紀不立有言之者

輒以罪斥之君臣昏亂以至於滅有文集二十
卷竝行於世焉

江總傳

唐李延壽

總字總持七歲而孤依於外氏幼聰敏有至性
元舅吳平侯蕭勸名重當世特所鍾愛謂曰爾
神采英拔後之知名當出吾右及長篤學有文
辭仕梁爲尚書殿中郎武帝撰正言始畢製述
懷詩總預同此作帝覽總詩深見嗟賞轉侍郎
尚書僕射范陽張纘度支尚書琅邪王筠都官
尚書南陽劉之遴竝高才碩學總時年少有名
纘等雅相推重爲忘年友會之遴嘗酬總詩深

相欽挹累遷太子中舍人侯景寇建鄴詔以摠
權兼太常卿守小廟臺城陷避難會稽郡憩於
龍華寺乃製修心賦摠第九舅蕭勃先據廣州
又自會稽往依焉及元帝平侯景徵爲始興內
史會魏剋江陵不行自此流寓嶺南積歲陳天
嘉四年以中書侍郎徵還累遷左戶尚書轉太
子詹事摠性寬和溫裕尤工五言七言溺於浮
靡及爲宮端與太子爲長夜之飲養良娣陳氏
爲女太子亟微行遊摠家宣帝怒免之後又歷

侍中左戶尚書後主即位歷吏部尚書僕射尚書令加秩既當權任宰不持政務但日與後主遊宴後庭多爲艷詩好事者相傳諷翫于今不絕唯與陳暄孔範王瑗等十餘人當時謂之狎客由是國政日頽綱紀不立有言之者輒以罪斥之君臣昏亂以至於滅禎明三年陳亡入隋拜上開府開皇十四年卒於江都年七十六其爲自序云太建之時權移羣小諂嫉作威屢被摧黜柰何命也識者譏其言跡之乖有文集三

十卷

與詹事江總書

陳後主

管記陸瑜奄然殂化悲傷悼惜此情何已吾生平愛好卿等所悉自以學涉儒雅不逮古人欽賢慕士是情尤篤梁室亂離天下靡沸書史殘缺禮樂崩淪晚生後學匪無墻面卓爾出羣斯人而已吾識覽雖局未曾以言議假人至於片善小才特用嗟賞况復洪識奇士此故忘言之地論其博綜子史諳究儒墨經耳無遺觸目成誦一褒一貶一激一揚語玄析理披文摘句未

嘗不聞者心伏聽者解頤會意相得自以爲布
衣之賞吾監撫之暇事隙之辰頗用譚笑娛情
琴樽間作雅篇艷什迭互鋒起每清風朗月美
景良辰對群山之參差望巨波之滉漾或翫新
花時觀落葉既聽春鳥又聆秋鴈未嘗不促膝
舉觴連情發藻且代琢磨間以嘲謔俱怡耳目
竝留情致自謂百年爲速朝露可傷豈謂玉折
蘭摧遽從短運爲悲爲恨當復何言遺跡餘文
觸目增泣絕絃投筆恒有酸恨以卿同志聊復

敘懷涕之無從言不寫意

檄陳尚書江總等文

隋煬帝

南北雖殊風雲在望載懷虛遲寤寐爲勞獻歲
猶寒比當清豫匡贊乎國良亦慇懃寡人忝膺
朝寄董律專征跋涉山川今次江際公等文儒
自立器用適時冠蓋二世蔭德兼重孔老殊教
名墨異家金匱珠韜銀編玉策莫不騰於舌杪
散在筆端遂古成敗之機近代安危之跡照同
懸鏡明若觀火無待指南自應神晤猶恐思之
未審差以毫釐聊煩翰墨略申梗槩自穹昊生

民樹之司牧義軒以降書契可紀咸一姓承立
四海無兩帝漢道云季三方鼎立時惟版蕩世
匪休明當塗起而蜀亡典午興而吳滅永嘉喪
亂紫宸曠主劉石苻姚之僞僞夏僭燕之醜妄
塵大寶事乖圖錄魏室乘時兆基朔野經始嵩
洛未暇江湖有周受命敵非齊氏務在兼并不
遑外略蕞爾吳越自相君長竊擬王者之儀妄
談天子之氣偷安假息綿歷世祀我大隋之肇
開寶祚光有神州皇帝感曜魄之靈應太微之

座千年啓聖萬代一時深仁至德寧濟群品越
海窮河東漸西被旄頭之屬歷代之霸作我臣
民匍匐服裳惟彼江表獨隔皇風夫物極則反
否終斯泰郭璞有云年經三百天下大同茲實
玄運已定於前聖主膺期而出欲以區區之陳
國違上天之冥數其不可存者一也大必包小
天地之常規明能通暗日月之常理論道德以
唐陶而征有苗語衆寡舉海內而當群小在長
江舟楫之用矜其積習而山川共有我據上游

鼓棹之能吳楚不異高艫巨舫東西萬里扼喉
撫背水陸千途彼之兵士不過十萬首尾分布
所在危急加以屯戍邊方淹積歲序風雨以爲
櫛沐蟣虱生於甲冑望我寬仁思倒戈戟通在
戎行更成敵國守以時月則負爛土崩接以鋒
刃則鳥驚鹿走理在必然不假枚卜此不可存
者二也豐侯好酒實喪厥邦梁伯役民潰其宗
社彼之僞主覆車是襲日夜沉湎曾無節度繕
造官室莫知窮已竭四民之產荒縱其心斂百

姪之哀以爲已樂寶衣玉食填積後宮短榻麤
體不充編戶一芥之善蔑爾無聞五子之歌宛
然悉備雖欲勿喪其可得乎此不可存者三也
僞主忌能護短酷法淫刑骨鯁之臣盡見疎斥
諫諍之士皆被屠害遐邇結舌衣冠解體人妖
鬼怪觸類呈災稚齒耆年咸知殘滅此不可存
者四也以此小邦攝於大國邊烽夜動照彼都
城戍鼓晨嚴震其宮殿累基十二方此未危懸
縷千鈞比斯非切而莫知憂恐更自驕矜曾無

事大之心專行犯上之志侵軼我邊鄙招納我
叛亡國家爰自受命每從含養敦以鄰睦申其
聘好冀能守彼宗枋靜其疆域而長惡益甚縱
毒彌深吳會雄俊之人湘郢耿介之士乞師請
命盈庭滿闕帝乃憫然矜彼黎獻授鉞推轂弔
民伐罪已有別詔惟廢僞主之身自餘士庶普
從肆眚向所陳說咸是格言非曰游談共相欺
誤且劉叔納譙周之計而獲存孫皓用薛瑩之
圖而致福此二子者終有良臣之譽皆無陷君

之譏何則所耻者小所存者大若憲章往彥聿
遵前軌則爲主享封侯之業祖櫛延血食之期
江東士民實受其賜公等身保榮貴名垂竹帛
豈不美歟若膠柱不移守迷莫變率其蟻衆敢
拒王師軍有常刑悔無及矣禍成俄頃宜早圖
之使人今還遲有委曲言不盡意豈復多云楊
廣白

酬江揔詩

梁劉之遴

上位居崇禮寺署鄰棲息忌聞曉騶唱每畏晨
光輒高談意未窮晤對賞無極探志共遨遊休
沐忘退食曷用銷鄙吝枉趾覲顏色上下數千
載揚推吐胸臆

同江詹事登宮城南樓 陳徐陵

元良屬上德率土被中孚漢幄朝無怠周門夕
復趨桓經旣受業賀拜且尊儒壯志諧風雅高
文會斗樞鏗鏘叶舞蹈炤爛等琨瑜溝水慙雄

伯漳川仰大巫鮑魚寧人俎釣鱉匪克尉叔譽
恒詞屈防年豈濫誅

遺事

後主在東宮欲以江摠爲詹事令陸瑜言於孔
奭奭曰江有階陸之華而無園綺之實瑜具以
白後主乃自言於高宗高宗將許之奭奏曰摠
文華之人今太子文華不少願選敦重之才以
居輔導帝卒以摠爲詹事

陳書孔
奭傳

司馬消難入陳見朝士皆積經史消難切慕之
乃多卷黃紙加之朱軸詐爲典籍以矜僚友江
摠戲之曰黃紙五經赤軸三史

摠爲詹事時製登宮城五百字詩副君及徐陵
以下竝同此作徐後謂江曰我所和弟五十韻

寄弟集內

陳書姚察傳

南朝鼎族多夾青溪江令宅尤占勝地至宋時
段約居之王荆公詩讀時江令宅今日段侯家

金陵故事